

Apudok Shup Douk Jut Nenekap Iri

*Banenyi Baraen Um Enyudok Baraen Jut
Nenekan Iri*

ves 1-2 Jut nowem yopinyi baraen um Iruhin
nini Jisas Kraiss hutaurum eshesh Kristen

ves 3-16 Anam armam henek rohwumesh iri
hawish um eshesh Kristen aria hape henek
rohwumesh um shunek yoweishi inahos.
Aria Iruhin ta nuwanam um yoweishi inahos
amam henekesh iri

ves 17-23 Jut nahwarap um miyotu dodog aria
munek yopihi atih aih

ves 24-25 Jut natuk Iruhin ananin nyeigur
nyato iruhw

¹ Eik Jut, Jems ananin wanin douk yape
shakamum Jisas Kraiss yenek ananin mour iri
yenekumepogu apudok shup ipak armam ar-
mago douk Iruhin nahwarep um pupe ananip
atip iri. Ipak douk apakin Yain Iruhin urkum
manawashamep aria Jisas Kraiss narokarubep
pape wosik iri. ² Eik yakri ehudok aih um Iruhin
nenek gihaumep um huni ehudok um ipak urk-
wip punawasham kupaishi um huni ehudok um
ipakiruh aparuh hur wosik um hutogur dedebeh
atih um ipak.

Henek Rohwumesh Iri Armam Amamin Baraen

³ O ipak eikish abom arpes! Sagomatin
eik yape urkum morum yakri iwemepogu um

ipak enen baraen um agundok Iruhin nataurum apak ihishmorim narap matanamori mape wosik abom um. Aria douk eik yemnek um eik ta iwemepogu um ipak enyudok enen baraen. Baraen enyudok. Eik yakri ipuhur um piyoh enyudok Iruhin ananin adurin baraen douk apak Iruhin ananish arpesch makri adurin masuhwen magipeshen iri. Aria piyotu dodog pubo Kraiss ananim horim douk henek rohwhakripesh kupainyi baraen iri amamin baraen nyubuhuk. Enyudok baraen douk apak makri adurin magipeshen iri, Iruhin douk nakopen atuh meyoh apak ananish arpesch. ⁴Um maresh? Anam armam henek rohwhatogur kabi Iruhin ananim um aria hanabeshuk hawishi um ipak Iruhin ananipi. Aria enen baraen douk seiwok nyetem Iruhin ananik Buk iri douk nyakrium amudokmori armam. Enyen nyakri Iruhin douk juwehosin-umam aria ta nusuhw amamig kwotog aria nukri amam henek yoweishi inahos iri. Amam douk madae hudukemesh um Iruhin uwe aria henek rohwhumesh hakripesh hakri baugenyum baraen um Iruhin nataurumap meyoh um douk namudok. Hakri, "Aria eshesh wata shupe shunek yoweishi inahos um, Iruhin ta nenek gihaumesh aria mare nunekesh shumnek eriger, uwok." Amam hakripesh enyudok baraen um nyutaurum amamih eneheneh yoweih aihi um shenek wehrur um. Aria amam hakonaguk agabus Jisas Kraiss douk anan atun abom Dodogowini Debeini.

⁵ Adur, ipak padukemen enyudok baraen um seiwok Debeini nataurum eshesh Israel um.

Anan naraesh shakutukuk agudok debeigi nahobig Isip shanak shape wosik. Aria madae roubi uwe, anan nabo shashudok Israel douk madae shumnek ananin baraen shugipeshen iri uwe shagok. Aria douk eik yakri gamo ikripep um ipuhur um ipak urkwip purum enyudok Debeini neneken um eshesh Israel iri. ⁶ Ipak urkwip purum eshudok enselahos shopunek douk seiwok madae shupe shakamum Iruhin shiyoh enyudok mour nyani debeishi nyeiguhw anan nekeshesh iri uwe. Eshesh shakutukuk esheshibur wabur. Douk namudok aria Iruhin noweshikesh dodog abudok dodogowibi senab douk bape ihih nyumneh iri aria douk shape arukwutigunum. Eshesh shape shatrugun um ahudok debeihi nyumnah douk ta anan nusuhw eshesh shuni ihishmorim arpesh esheshig kwotog ahi. ⁷ Aria ipak urkwip purum eshudok arpesh douk seiwok shape arbudok biarub yoweirubi warub Sodom iri Gomora bani arbudok bape hurukatin iri. Eshesh shenek eneshenesh yoweishi inahos abom um shenek wehrur um. Aria seiwok arigaha douk, eshesh douk shani eshudok enselahos shape shatrugun um ahudok nyumnah um Iruhin nusuhw esheshig kwotog ahi. Eshesh shenekesh namudok aria Iruhin nawanam-umesh eshudok yoweishi inahos nenek debeihi nyih douk hanu hape ihih nyumneh iri hanish aria shemnek debeiri eriger shape ihih nyumneh. Anan nenek enyudok nyatogrumesh um apak mutrish aria munogugur mare mugipesh esheshih yoweih aih, uwok.

⁸ Mamudok armam douk hanabeshuk hawish um ipak Iruhin ananish arpesh iri, amam apa

henek ehudokmori aih eshesh Sodom iri Gomora shenekeh iri. Ihismorim yomnis amam hatrus iri douk sohur amamip urkwip um hunek yoweih aih um amamiruh yegeshiweruh. Aria amam hekenyuk agabus Iruhin ananin dodogowinyi baraan aria heyagwreh-umesh enenyenen eshudok nyeiguhw shatoumeshi kabi enselahos um. ⁹ Seiwok enyudok ensel douk debeinyi abom um ihishmorim enselahos iri nyonahwar um Maikel iri nyani Satan shanogogonim um ta omi nyurao Moses ananit mukwut um, Maikel madae nukri anan douk dodogowini aria nukri niyagwreh-uman enenyenen Satan uwe, uwok. Anan nakripan nakri, “Debeini anan kanak ta wosik nuhen!”

¹⁰ Aria mamudok douk hanabeshuk hani ipak pape iri heyagwreh-umesh enenyenen ihishmorim eshudok eneshenesh douk amam madae hudukemesh iri uwe. Aria ehudok aih amam hadukemeh aria hagipesheh iri, eheh douk kabi wanarish mahish eshesh kanak shadukemeh shenekeh um. Amam henek ehudok yoweih aih aria ta ehudok aih atin ta hunekam yowem abom.

¹¹ Adur, kweipon amam ta humnek debeiri eriger! Amam douk hagipeshuk Kein^{1:11} yoweih aih. Aria amam urkwip por abom um utabor atabor aria hagipesh abom Balam^{1:11}iri

1:11 1:11 Seiwok Kein nenek yoweishi inahos namudok. Anan juwehosin um ananin wanin aria nan nagok. Ipak putik Jenesis 4:1-5. **1:11 1:11** Seiwok Balam nakri nutogur Iruhin ananin profet aria kupaimi hunokuneman um utabor um nunek Iruhin ananish arpesheh shunek yoweishi inahos. Ipak putik Namba 22:5-41.

yoweih iah. Aria amam hakonaguk agabus Iruhin kabi douk seiwok Kora^{1:11} agab um. Amam douk henekesh namudok aria amam ta douk yowem abom kabi douk seiwok Kora yowen abom um.

¹² Babudok nyutob ipak pani kupaishi Iruhin ananish arpesk urkwip por arag atin aria pantorum pape pawok worigun obi nyutob, amudok armam shopunek hani ipak pape hataurumep pagnoh. Amam hani ipak hapeum, amam henek yoweih iah um Iruhin ananis nabes. Madae abraenyim um agundoki worigun amam urkwip porum amam kanak atin. Amam abraen madae nyom um amamih yoweih iah amam hape henekeh iri uwe. Amam hani ipak pape pawok worigun aria amam madae urkwip purum hukri hubiram kupaishi arpesk uwe. Amam urkwip porum amam atum. Amam douk hape kabi onog orug.1:12 orug douk uhwin nyaragwi aria eshah madae anah hurari uwe. Aria shopunek, amam kabi douk shuruwep peiragosi rowos. Douk nyutob um shuruwep pir um banaki aria shuruwep madae enep pir uwe. Agagos douk shatukagos um baugos aria yarigos abom. ¹³ Amam henek abraenyih iah aria ehudok aih hatogur kabi youg debeibi morub batuk aria benek ahwas sanaki sakus anagas um. Aria shopunek, amam

1:11 **1:11** Kora nenek yoweishi inahos nekenyuk agab Iruhin ananin baraen namudok. Anan narao anam armam hagipeshan hakanuguk agabus Moses nani ananin big Iruhin nakonen iri.
 1:12 **1:12** Amamin baraen madae nyutaurum arpesk uwe. Enyen kabi orug douk madae gwunek eshah hurari iri uwe o kabi rowos douk shuruwep madae enep pir um uwe.

hape kabi unib douk waktukuk owowih yeh wanarahe wanak hwaroh iri um. Aria Iruhin douk nenek anabur arukwutigun-iburi wabur bape um ta kweipon hunak hupe ihih nyumneh um.

14-15 Adam ananip awirop sharik shape aria awiros sakitak sanaki aria sakri um namba 7-ip um shabuki anudok arman Inok. Aria seiwok Inok nakripesh enen baraan um eshudok douk ta kweipon shugiguk shutograri iri. Anan nakriyen um amudokmori henek rohwumesh iri armam nakri namudok, "Ipak mnek! Kweipon Debeini ta nini ananish sabaishi tausnish en-selahos shunaki. Eshesh ta shunaki um anan nusuhw ihishmorim arpeshe esheshig kwotog. Aria nuwanamesh yoweishi inahos yoweishi arpeshe nunekesh shumnek debeiri eriger um nuyabigesh shudukemesh um eshesh douk shenek yoweishi inahos aria eshesh douk shenek debeiri eriger. Aria anan ta nuwanamesh esheshih yoweih aih um shakon agabus Iruhin um aria sheyagwreh-uman enenyenen yoweinyi baraan um." 16 Amudok henek rohw iri armam amamiruh aparuh madae hur wosik aria hupe wosik atin uwe, uwok. Amam apa henek sousunah hariguk um eneshenesh eshudok douk shatogrumam iri. Aria amam apa heyagwreh hariguk um eneshenesh eshudok. Amam hagipesh yoweih harik hapeum iri aih um henek yoweishi inahos um. Amam hapeum hakri hutuk amamish atish nyeiguhw shuto iruhw aria hakripesh yopinyi atin baraan kupaishi um huhur esheshiruh aparuh um shugipesham shunek eneshenesh yoweishi ina-

hos amam hakriyesh iri.

Ipak Ta Pupe Dodogowip Atip Abom

¹⁷ Aria ipak eikish arpesh abom! Ipak ta urkwip purum enyudok baraan um eshudok douk riguk Debeini Jisas Kraiss ananim aposel hakriyesh-umesh um ta shutograri iri. ¹⁸ Amam hakriyep hakri, “Hugiguk iri nyumneh hutogurum, anam armam douk ta hunumogesh Iruhin ananish aih iri ta hutogur. Amam ta hukon agabus Iruhin aria ta hugipesh yoweih harik hapenyam iri aih aria hunek eneshenesh yoweishi inahos.” ¹⁹ Aria douk amudok atum armam hape henek ipak Iruhin ananish arpesh panadi-yogurum pape sisiguk. Amam douk hagipesh yoweih harik hapenyam iri aih aria henek eneshenesh yoweishi inahos amam kanak hakri hunekesh iri. Amam douk madae Iruhin ananin Mishin nyupenyam uwe, uwok.

²⁰ Aria ipak eikish arpesh ta pusuhw Iruhin ananin baraan dodog pugipeshen. Iruhin douk baugos um ehudok yopihi aih um ipak penek bilipuman um. Aria putogur dodogowip abom um ehudok aih um penek bilipuman um. Aria ipak ta pugipesh Iruhin ananin Mishin nyupuhur um punek beten um aria ta punek beten. ²¹ Aria Iruhin douk urkum manawashamep aria ipak ta pupe hurukatin um anan. Aria ipak pupe putrugun um apakin Debeini Jisas Kraiss douk nenek gihaumep iri um nunekep pupe wosik abom ihih nyumneh.

²² Ipak penek gihaum eshudok arpesh douk shasuhw Iruhin ananin baraan aria eshesh

madae shusuhwen dodog abom shugipeshen iri uwe. Aria putaurumesh um punelesh shusuhwen dodog shugipeshen. ²³ Aria enesh douk hurukatin um shakri shukonaguk agabus Iruhin iri, eshesh kabi douk shagrukuk orokohunih um nyih um. Douk namudok aria ipak ta putaurumesh putukeshi um ehudok nyih pu-raesh shutanamori shupe wosik. Aria ipak pukri gihaumesh eshudok enesh douk wata shatanam shagipesh yoweih harik hapenyesh iri aih um shenek yoweishi inahos um aria putaurumesh. Aria pukri putaurumesh um, ipak ta gamo pudukemesh um ta wosik atin ipak pugipesh esheshih yoweih aih. Ipak ta pukri uwok-umeh abom.

Apak Ta Mutuk Iruhin Ananin Nyeigur Nyuto Iruhw

²⁴ Apak mutuk Iruhin ananin nyeigur nyuto iruhw. Um maresh? Anudok Iruhin anan douk dodogowini aria wosik um nutaurumep nunekep piyotu dodog aria mare putu punelesh enesh yoweishi inahos. Aria shopunek, anan douk dodogowini aria wosik um nunekep pupe wosik aria mare enen baraen nyupenyep um enesh yoweishi inahos. Aria punadudareh abom abudok nyutob anan nuraep punak ganudok anan natrugun abom aria napeum. ²⁵ Anan douk anan atun abom nape apakin Iruhin douk nataurumap narap matanamori mape wosik atin iri. Aria enyen douk um enyudok mour apakin debeini Jisas Kraiss nenenen iri atin aria Iruhin narap mape namudok. Douk namudok aria agundok natrugun abom um nini

debeinyi nyeigur nyuni debeinyi big nyuni
agundok Iruhin dodogowinari nape debeini um
eneshenesh eshudok um douk shupe um anan
atun. Seiwok baugos um arigaha douk, arigaha
kweipon shopunek ta shupe um anan atun ihih
nyumneh! Adur atin.

IRUHHN ANANIN BARAEN
The New Testament in the Coastal Arapesh dialect of
the Bukiyip language of Papua New Guinea
Nupela Testemen long tokples Coastal Arapesh long
Niugini

copyright © 2003 Wycliffe Bible Translators, Inc.

Language: Coastal Arapesh (Bukiyip)

Dialect: Central

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-05-07

PDF generated using Haiola and XeLaTeX on 21 Feb 2024 from source files dated 31 Aug 2023

d1ef5a4e-3e53-5ef0-80e4-4cd8770ca6e6